

1 TESALONICENSES

Tesalónicaya' huaknopö'eritaj Pabla huakkuruda o'manigmadoya'uyate.

Tesalónicaya' Jesucristotaj
huaknopö'eri
huakupopakika'eritaj Pabla
nogerea o'manigmadoya'uyate.

1 ¹Huadi'da huama'buy huadi'da
huidpo o'maene. Apag Diostaj
Jesucristo Huairitaere moknopöepo.
Tesalónica jakyo bokupopakika'.
A'batadi'keaya'po bo'kupopakika'. Do
Pabla on'nigmadoya'ne. Doere Silvano
kenpa'ti Timoteoere ö'ey. Apag Diosa
Jesucristo Huairierea daka' 'urua'da
mo'tounhue', bo'tihuapokonhue'
mo'nopo'noeyanhue'po ijtiona'paki.

Tesalónica jak huaknopö'erioyey
Jesucristotaj daka' o'noknopöepo
'urua'nanada ögkika'. Pabla
ona'ti o'matinopöepo
Diostaj dakiti ona'uyate.

^{2,3}Jesucristotaj daka' moknopöepo
nogomeytaj huadakda bokika'. Kenpa'ti
Diostaj di' mo'epo nogomeytakon
daka' mo'matihuapokika'ne. Kenpa'ti
moknopöepo batikhue'da Jesucristo
Huairi e'tiaktaj mon'maboika'. Kenda
durugda on'tinopöepo Apag Diostaj
"Tesalónica huaknopö'eritaj dakiti
Dios," kirigayo' o'tiona'pakikay. ⁴Diosa
di'nanada mo'ene. Ke'nensi'po huae'

mo'baktie'ea'uyne o'nopöene, egomey,
pogomey. ⁵A'nenda opudomeyere
ö'ika'po Jesucristoen huadak hua'a
o'nonbatia'pakonhuahuame'ne.
Ijja'poda onbatia'pakhue' ö'neme'ne.
Diosen hua'a o'nonbatia'pakikame'ne.
Kenda huadak hua'a buttida ö'e Diosen
Nokirega mo'nopöeame'ne. Diostaj
eknopöe' a'tihuapokya'po Diostaj
o'nigpeikay. Huadakda opudere
ö'ika'mey opud kenda mo'nopöet.

⁶Jesucristoa Diostaj o'nigpeika'po
pai'nanada o'nopo'e'uyate. Oro'akon
Diostaj o'nigpeika'po pai'nanada
o'nopo'ikay. Opud konigti Jesucristoen
huadak hua'a durugnanada mo'pee'uy.
Diosen Nokirega mo'durugpaka'uyne.
Moknopöika'nok pai'nanada
mo'nopo'e'ika'. ⁷Macedoniabayo
Acayabayo aya'ada Jesucristotaj
huaknopö'eria kenda mo'tipeedepo
opudomeyonig Jesucristotaj eknopöe'ta'
on'pakika'. ⁸Huakka' aratbuttaj
nogyon nogyon Jesucristoen huadak
hua'a mo'manbatia'pakonhuame'ne.
Macedonia huadaribayo huae'eria
Acaya huadaribayo huae'eria nobbaya'
nobbaya' huae'eria huadak hua'a
on'peedepo kenpa'ti Diostaj daka'
moknopöe on'tipeede. Konigepo
Diostaj moknopöenok kenda nogya'

nogya' batia'pakhue'dik o'ey. ⁹Opud Tesalónica huaknopoe'eria Jesucristotaj daka' o'noknopoika'. Kenda nogya' nogya' bo'huaika'ne. "Tesalónica huaknopoe'eria Pablomeytaj durugteda on'baedpo on'manigpee'uyate. Kenpa'ti on'nopo'korea'depo ke'nen e'ketka' diostaj on'maenondepo huaboa'da hueretda Diostaj o'noknopoika'." Kenda nogya' nogya' bo'huaika'ne. ¹⁰Kenpa'ti Diosensi'po Jesústaj e'bueytada Diosa o'noyhuada'uyate. Kenpa'ti Diosa ke'ponananada castiga o'magka'apo. Jesúsa oro'tanayo huaknopoe'eritaj daka' bo'tiaka'apone. Ken Jesucristo kurudya' o'tiakapo. Jesucristotaj daka' o'noknopopepo o'nonmabo'ika'. Kenda nogba nogbaya' bo'huaika'ne.

**Tesalónica aratbuttaj Diosen
Jesucristoenere 'urua'da
o'manmadika'uyate Pabloa.**

2 ¹A'nenda opudtaj ijmatá'unhua'po Jesucristoen huadak hua'a o'nonbatia'pakonhua'po daknopoda o'nonbatia'pakonhua'pok mo'nopo'korea'po daka' Jesucristotaj moknopoe'uy. Nama'da ijje'po ta'unhuahuahue' o'ne'uy, kenda mo'nopoet egomey. ²A'nenda Filipos huakka' jakyo ijjeonhua'po Jesucristoen huadak hua'a ijmanbatia'pakonhua'depo diga' do'taj mentidi'kudhua'po kenpa'ti dakhuea' menogkadhua'uyne. A'ti o'nen jakyokon opudtaj ijtiakpo huadak hua'a e'manbatia'pakte huakka'mona pakhue' e'ne'tada kenda nopohue'ada kenpa'ti me'pukhue'ada Diosa be'tihuapoknok teynopo'da Jesucristoen huadak hua'a o'nonbatia'pakonhua'uyne. Kenda mo'nopoet. ³Huadak hua'a nama'da manbatia'pakhue' ijjunhua'po aratbuttaj nama'da huaknopoe' nama'da e'mana' manmadikahue' ijikay. Aratbuttaj

buttida huaknopoe' daknopo'da buttida hua'a ijmanmadikikay. ⁴Huadak hua'a Pablo daka' o'manbatia'pakika' Diosa o'nopoek "Aya'tada huadak hua'a yamanbatia'pakika'," Diosa mena'uyne. Konigepo huadak hua'a 'uruda ijmanbatia'pakikay. "Huadakda o'manbatia'pakika'." Kenpa' aratbuta e'huat'aj pakhue' e'eada "Huadakda o'manmadika'ika', do'huedyo'da o'kika'," Diosayo'da e'huat'a' ijpakpo. Diosa oro'en e'nopoe' o'nopoe'ika'. ⁵Do'taj me'nonpeike'po "Huadakda mo'ene, huadakda bo'kika'," kenda nama'da onahue' o'nika'uyne. O'nen huakupe a'bakaya'po nama'da onahue' o'nika'uyne. ⁶"Pablomey huadakda o'ene." Yan'batia'pakonhua'. Oro'anayo onahue' o'nika'uyne. "Oro' Cristoen huata'moneri o'ey. Oro'taj nigpeika'dik mo'ene." Kenda ona'dik o'nenig'a onahue' o'nika'uyne. ⁷Daka' on'toika'ne. Do'tayo'da me'nigpeike'po ighua' onahue' o'nika'ne. Konig huaye yobedtaj di' o'nika' daka' on'toika', ken konigti opudtaj di' o'nika'ne. ⁸Huakka' di' o'nepo Jesucristoen huadak hua'a e'manmadikika'ta' ijpakpo kenpa'ti Jesucristotaj kanoknopoe'po kenpa'ti kan'nigpeike'po opudomeytaj o'tihuapokta' ijpakika'uy. ⁹"Diosen hua'a o'nonmadikika'nig kente huakupe men'yok." E'mana'ta' pakhue' ijje'po huadak hua'ayo'da kenpa'da e'manmadikika'ta' ijpakpo o'nonmadikika'ne. Huadak hua'a o'nonmadikendepo do'hueddakon aypotehuapa' diga' ijbaa'ika'uy. Huame'noe sikyoere diga' ijbaa'ika'uy. Kenda mo'nopoet.

¹⁰Opud huaknopoe'eriere ijika'uy. Do'taj bo'tiahuayikame'ne on'peikame'ne. Diostaj daka' yoknopoika'uy, kenpa'ti huadakda ijkika'uy kenda on'tinopoe'ne kenpa'ti Diosa me'tinopoe'ne. Dakhuea'

o'ka'uy be'api' huaahue'dik me'nene.
 11,12 Konig be'api' huaoa huasi'potaj
 daka' o'manmadikika' ken konig
 Diostaj daka' yan'nigpeika' daka'
 o'nonmadikikame'ne opudtaj.
 Diosen mo'ene. Konig Diosensi'po
 mo'ene. Diosere 'urunanada
 mo'noeonhuahuika'apone. Diosensi'po
 ya'nepo huadak yag'kika'. Kenda
 aya'tada o'nona'ika'ne.

13 Diosen hua'a
 o'nonbatia'pakonhua'uyne
 mo'nigpeepo moknopoe'uyne.
 Konig huabokereken e'manmadika'
 o'e nopoehue'ada mo'peepo,
 moknopoe'uyne. Diosen buttida
 e'manmadika' o'e mo'nopoepe
 mo'nigpee'uy. Konigepo opud
 Tesalónica huaknopoe'eritaj "dakiti
 Dios," yona'ikay. 14 Jesucristotaj
 moknopojika'nok onyoyo' huae'eria
 bo'tierikonhuame'ne. Dakhuea'nanada
 mogkadhuahuame'ne, egomey
 pogomey. Konigti Judea huadaribayo
 judío huaknopoe'erien onyoyo'
 huae'eria dakhuea' on'magka'ika'.
 Judío huaknopoe'eritaj
 on'magka'ika'. 15 A'ennada
 judío aratbuten adhuae'pane'
 Diosen huamanbatia'pakeritaj
 on'batiarakikame'te. Kenpa'ti
 judíoa Jesús Huairitaj on'arakuyate.
 Do'takon dakhuea' mogkika'po do'taj
 me'nen'uyne. Kenpa'da dakhuea'
 ogkika'po Diostaj durugpakahue'
 o'nika'. Aratbuta huadak hua'a
 peehue'dik ka'nike'po dakhuea'da
 on'kadhuahuika'. 16 Dios judío ehue'taj
 dakhuea' e'ka' kamanopo'kore'po
 Jesucristoen huadak hua'a
 ijmanbatia'pakika'uy. Judío aratbuta
 mo'manmadika'batika'uyne. Ken
 konig ogkika'nig'a Diostaj nogiti nogiti
 dakhuea'da ogkika'. Oynayo Diosa diga'
 o'bahuadiaydepo ke'ponanada castiga
 o'magka'apo.

**Tesalónica jak huaknopoe'eritaj
 onte'ti e'bata'huadunhua'ta'
 o'pak Pabloa.**

17 Opudtaj o'nokhua'depo nogyoda
 adteda o'nokika'po opudtaj huakka'
 ijnopojikay. Kenpa'ti e'ta'huadunhua'ta'
 huakka' ijpakikamey. 18 Opudtaj
 a'bata'huadey e'nopojika'tada
 huahue'dik o'ikamey. Donayo nogok
 nogok a'bata'huadey e'nopojika'tada
 toto' huairia menokboe'ikame'ne.
 19,20 A'timon Jesucristo Huairia onte'ti
 bo'huatiakapone. E'huatiakde'te
 do'hua e'manmadika' Jesucristoen
 daka' moknopounhua'po 'urua'da
 mo'nigpeunhua'nok Jesucristo Huairia
 e'bahuahuayde'te durugnanada
 ijdurugpakapoy. Kenpa'ti huadakda
 moknopounhua'nok kenpa'ti Jesucristo
 Huairitaj daka' monigpeika'nok "dakiti
 Dios" yona'ika'apoy, egomey.

3 1 Konigepo Atenas jakyo
 ijika'po opudomeytaj tipeehued
 ijjepe "Tesalónica huaknopoe'eri
 monig yanoknopoe't monig Diostaj
 yan'nigpeiket," ijnopoepe, "Iyo Atenas
 jakyo Silvanoere botta'yo'da a'ikaya'po.
 2 Timoteotaj oro'en huama'buy
 opudtaj a'manigta'monay.'" Ijnopoe'uy.
 Diosa Timoteotaj oktie'ea'uy,
 huadak hua'a kamanbatia'pakike'po
 kamanmadikike'po oktie'ea'uy.
 Doere huadak hua'a daka'
 o'manbatia'pakika'uy. Opudomeytaj
 nogiti nogiti eknopounhuahuika'
 kabatihuapoke'po on'nigta'mona'uyne.
 Kenpa'ti nogiti nogiti e'nigpeika'
 kabatihuapoke'po on'nigta'mona'uyne
 Timoteotaj. 3 Kenpa'ti aratbuta
 opudtaj en'tieriktada kenpa'ti
 dakhuea' egka'tada moknopoepe
 batikhue' ka'ne'po on'nigta'mona'uyne.
 Jesucristo moknopoenok
 aratbuta bo'tierekonhua'apone,
 bo'tidi'kudhua'apone, dakhuea'

mogkadhua'apone mo'nopoet.

⁴Kenpa'ti opudtaj on'ta'huadunhua'po, "Jesústaj oknopoehue' huag'eria oro' huaknopoeritaj mo'batierikapone kenpa'ti dakhuea' mogka'apone." Kenda o'nona'uayne. Kenda opudtaj mogka'depo kenpa'ti oro'takon mogka'uy mo'nopoet. ⁵Konigepo "Menpa' opudtaj toto' huairia kenda yanoknopoebatik nama'da ya'manetpi'. Kenpa'ti yanoknopoebatikdetpi'. Huadak hua'a o'nonmadika'uynig'a." Ijnopoepo ijmepe'kuy. Kenpa' ijnopoepo Timoteotaj on'nigta'mona'uayne. "Jesucristotaj monig moknopoika'. Monig monigpeika'." Yamanati'. Timoteotaj yona'uy, ken.

⁶Oynayo Timoteo

bo'ta'huadunhua'depo do'tekon o'kumejdeme'. Huadakda Diostaj o'noknopoika'te kenpa'ti huayahuaya di'da on'maika'te menbatia'pakato'me'ne. Oro'taj di'da moknopoika'po kenpa'ti e'tiakta' on'tipaknok konigti opudtaj e'tatiakta' o'paki. ⁷Jesucristoen huadak hua'a ijmanmadikika'nok aratbuta menhuadiayika'ne kenpa'ti dakhuea' me'nogkika'ne. Opudomeynayo Jesucristotaj daka' moknopoika'tenok on'tipeedepo durugnanada o'nea'ne do'taj. ⁸Oy opudomey Jesucristotaj oknopoebatikhue'da moknopoika'po daka' mo'nigpeika'po oro'omeya kenda o'nopoepo durugnanada o'noeonhuahuikay. ⁹Kenpa'ti opuda daka' moknopoika'nok durugnanada o'epo dakiti Dios ona'ikay. ¹⁰"Tesalónica huaknopoeritaj Jesucristoen nogiti nogiti kan'manmadike'po, nogiti nogiti eknopo' nogiti nogiti e'nigpeika' kan'mantihuapoke'po mota'mona'." Sikyo huame'noeere Diostaj o'tiona'pakikay.

¹¹"Tesalónica huaknopoeriedbayo betohua', Apag Dios, Jesús Huairi.

¹²Konig Tesalónica huaknopoeritaj oro'a di'nanada o'maikay. Konigti Tesalónica huaknopoereria huayahuaya di' e'maika' kenpa'ti aya'tada di' e'maika' yabatihuapokika', Jesús Huairi. ¹³Kenpa'ti huaknopoika' yamanopo'teypaka', Dios. Kenpa'da huadaknada huamae', dakhuea' kahue' kan'maike'po Diosa yabatihuapokika'. Jesús Huairiere huaknopoeriyoy en'tiakte 'uruda e'noknopoika'te, kenpa'da huadakda en'maika'te yabahuahuayti'." Kenpa' Diostaj o'tiona'pakikay.

**Kenda Diosa o'pakika' nogiti
nogiti yag'kikati'.**

4 ¹Oyedda, egomey pogomey, Jesús Huairia kenda o'paknok ighua'da ona'ne. Daka' men'pee' do'taj. Diostaj a'durugpakaya'po monig kika'dik o'ey a'nenda o'nonmadika'uayne. Kenda nogiti nogiti yag'kikati'.

²Jesús Huairia kenda o'paknok kika'dik mo'ene o'nona'uayne. Kenda o'nona'uynig mo'nopoet. ³Huadakda yanika'. Diosenyoda daka' yag'kika'. Kenda Diosa huakka' o'pak. Nog huabokerekere bakdejhu' yanika'. O'nen huatoe ehue'tada bakdejhu' yanika'. ⁴Huatoe'taj daka' yan'matoika'. Konig Diosa o'pak daka'da yan'manika'. ⁵Diostaj oknopoehue' huag'eria on'toepakpo daka' matohue' o'nepo huatoeda o'deretpakpo kenpa'da on'bakdejika'. Kenomey ogkika' konigti kahue' yanika'. ⁶Dakhuea' kahue' yane'. Huaknopoeriyoy huama'buyen huatoe'taj bakdejhu' yane'. Kenpa' huaka'eritaj Jesús Huairia castiga o'magka'apo. Kenpa' daka' a'nenda o'nona'uayne. ⁷Huadanknada kagkike'po kenpa'ti Diostayo'da kan'durugpakike'po Diosa bo'baea'uayne. Dakhuea' kagke'po

Diosa baehue' mo'uyne. ⁸Be'api' oro'taj e'peeta' pakhue' ee'nayo Diostaj peehue' o'ne. Diosen Nokirega mo'nopo'toene.

Oro'omey Diostayo'da o'nigpeikay.

⁹Kenda Diosa mon'madika'uynok huayahuaya di' yan'maika'. Nogiti do'akon ahue' o'nene egomey.

¹⁰Huabada nogyon nogyon Macedonia huadaribayo huaknopoe'eri

huama'buytaj di' mo'maika'. Nogiti nogiti di'nada yan'maika', o'nona'ne.

¹¹Huakka' bo'pakpo daka' yanika'.

Nogtaj dakhue'da bahuahue' yanika'po o'nenda yag'kika'. Kenda a'nenda o'nona'uyne. ¹²Ken konig bo'kika'nok oknopohue' huage'eria daka' moknokotdepo mana'dik mo'ene. Konig aya'da e'toeonigti e'dik mo'epone. Kusitokhue'dik mo'epone.

Jesucristo o'tiakpo huaknopoe'eritaj o'batobehuikapo.

¹³Oknopohue' huage'eri on'bueydepo onte'ti noyhuadhue' o'neaponok kenomeyen huabeta diga'da on'tabahuikika'. Huaknopoe'eria ekbueyde'te suhue' ehue'dik o'ene kenpa'ti oro'nayo huikhue'dik o'ene, egomey. Huaknopoe'erinayo noyhuaddik o'neapo. Kenda e'manopoea'ta' o'paki.

¹⁴Jesús o'buey'uyate. E'bueyada o'noyhuaduyate o'nopoene. Kenpa'ti aya' huaknopoe'eri e'buey'uytaj Jesús kenoka' e'tiakte Diosa o'manoyhuada'apo. Jesúsere kurudyo o'batobehuikapo o'nopoene.

¹⁵Kenda Jesús Huairia mo'nopoea'uyning kenda o'nonmadika'apone. Jesús Huairi e'huatiakte Jesúsén huaknopoe'eri on'mabueyde'uy ke'na noyhuadhued oro'omeytaj huakkuru tohuahue'dik mo'epone. Onokteteyo' bo'tohua'apone e'buey'uytaere huanoe'eriere mo'batobehuikapone. ¹⁶Ken kurudya'

Jesús Huairi o'huarakapo. 'Utta'da o'okoypo o'huarakapo. Konig Diosen huata'moneri huairi 'utta'da o'okoyapo, Diosen huatoka' trompeta 'utta'nada ea'te Jesús Huairi o'huarakapo.

Huaknopoe'eri e'buey'uytaj huakkuruda o'manoyhuadapo. ¹⁷Kenta' oro'omey bueyhued huage'eritaj kenomeyere kurudyo e'sihui'yo Diosa bo'tobehuikapone. Kurudyo onokteyo' Jesús Huairitaj o'huahuayapone.

Jesús Huairiere kenpa'da o'manoehuahauika'apone. ¹⁸Konigepo kenda mon'batia'pakika'po huayahuaya mon'madurugpakika', ken.

5 ¹Keniga huabayok Jesús Huairi o'tiakapo kenpa'ti kenoka' Jesús Huairi o'tiakapo nigmadoyahue'dik o'nene, egomey. ²Castiga a'magkaya'po Jesús Huairi o'tiakapo. Kenme'noete kenoka' onmabohue' ee'te idapi' o'tiakapo. Konig sikyopi' nopohue' ee'te huabereeri on'tiakika'. Ken konig nopohue' ee'te Jesús Huairi ida o'tiakapo. Castiga a'magkaya'po ida o'tiakapo. Kenda oyda mo'nopoet. ³"Daka'da o'maene. Be'api' oro'taj ogkahue'dik mo'epone." Oknopohue' huage'eria kenpa' e'batia'pakte idada Diosa castiga o'magka'apo. Konig ettone' bogdakhue' o'nepo asi'popakya'po idada diga' on'tiri'ika'. Ken konig idada castiga o'magka'apo. Be'api' monhue'dik o'neapo.

^{4,5}Opudnayo Diosen mo'epo konig huakjeyyo mo'ika'po huadakda bo'kika'. Huadak bo'kika'po konig huame'noeteda mo'ika'. Konig sikkiregyo huage'eri dakhuea' ogkika' ken konig, dakhuea' kahue' yanika'. Konig huabereeria aratbuttaj pai'da o'manop'eanika', ken konig Jesús Huairi o'tiakpo opudomeytaj pai'da nopo'eanhue' mo'epone, egomey.

⁶Nogomey sue'da on'nigpeepo Jesús Huairitaj onmabohue' o'nika'.

Konig kenomey ogka' kahue' yanet opud. Ya'nonmabo'ika'. Jesús Huairitaj ya'nonmabo'ika'. Daka'da mo'nopoepo huadakda bo'kika'po Jesús e'tiakte ya'nonmabo'ika'. ⁷Sikyo on'batayika'. Kenpa'ti sikyokon on'mamayika'. O'nokkudika'. ⁸Oro'omeynayo Diosensi'po o'epo konig huame'noete huae'eri o'epo, huadakda o'kika'ne. Okkudahue' mo'nepo daka' mon'nopeika'. Toto' huairia oro'taj nama'da ena'ta' bo'tipakika'ne. Kentaj mo'noktioka'. Sorotataj huaso'taj on'tioka'ika'. Huakutaj on'tioka'ika'. Ken konig daka' Diostaj mo'noknopopeika'po kenpa'ti di' huayahuaya mon'maika'po mo'noktioka'ika'. Konig huakutaj e'tioka'nig a'eya'po Diosa mo'nopo'yare'po oknopopeikay. ⁹Diosa castiga e'magka'ta' pakhue' o'epo e'manopo'yarea'ta' o'pakika'. Oro'omeytaj a'manopo'yareaya'po oro'en Jesucristo Huairia mo'nigbuey'uyate. ¹⁰Jesucristoa a'manoeahuahuikaya'po mo'nigbuey'uyne. Jesús e'tiakapotada oro' e'buey'uynayopi' e'noenayopi' konigti Jesúsere o'manoeahuahuika'apone. ¹¹Konigepo huayahuaya daka' yan'batiapakika'. 'Uruda yanoknopope'. Daka' yan'nigpeika'. Huayahuaya yan'batia'pakika'. Konig oy Diosen daka' bo'kika' konigti nogiti nogiti daka' yag'kikati'.

Pabla huaknopope'eritaj o'maboroay.

^{12,13}Opuden huaknopope'eri huairi o'nepo Jesucristoen mo'manmadikika'ne kenpa'ti Diostaj daka' yan'nigpeika' mona'ika'ne. Kenomeytaj daka' yan'matinopeika'po, yan'manigpeika'po, kenpa'ti di' yan'maika'. Kenda ijjakpo konig ighua'da o'nona'ne, egomey pogomey.

Kenpa'ti huayahuaya bahuadiayikahue' yanikati'.

¹⁴Huakka'ahuiti baahue' o'nika'. "Yan'baa'." Yan'manika'. Nogomeypi' nopo'durugpakhue' o'nika'. "Yan'nopo'korea'po yan'nopo'durugpak." Yan'manati'. Nogomeypi' sue'da on'nigpeika'. "Nogiti nogiti yan'noknopopeo yan'nigpeika'." Yan'manikati'. Aya'tada bahuadiayihue'da ya'neonhuahuika'. ¹⁵Be'api' dakhuea' egka'nayo kenpa'ti ogkahue' yane'. Huayahuaya 'urunanada yan'matoika'. Aya'tada huadakda yanika'. ¹⁶Diostaj daka' yanoknopopeika'po yan'durugpakikati'. ¹⁷Kenpa'da yan'tiona'pakonhuahuikati' Diostaj. ¹⁸Ke'poda e'eadapi' dakhue'da e'eadapi' huadakda e'eadapi' kenpa'da Diostaj dakiti ya'nona'ika'. Jesucristoen huaknopope'eri mo'enok kenpa'ti Dios o'paknok dakiti yan'tiona'pakikati'.

¹⁹Diosen Nokirega opudtaj mon'madikika'ne mo'nopo'toika'ne kenpa'ti bo'tihuapokika'ne. Diosen Nokirega kenda egkika'te "keje" ahue' yane'. Diosen Nokiregtaj "keje" ahue'dik yane'. ²⁰Huamanmadika'eritaj Diosa daka' o'manopopea'nok kenomeytaj yan'manigpeika'. ²¹Sue'ada huamanmadika'eri buttida on'nopoepo buttida hua'a on'manmadikika'. Nogomeynayo nama'da on'manmadika'. Daka' yan'maknopopeo, menpa' buttida onda', nama'dapi' e'manmadika' o'e, daka' yan'maknopopeo buttida huadik en'manmadika'nayo daka' yan'maknopopeo yan'manigpeika'. ²²Dakhuea' e'ka' yan'maenonpo onte'ti dakhue' e'ka'ta' pakhue' yanikati'.

²³Diosa 'urunopoa'da mo'manopo'eahue', huadak e'nopeika' bo'tihuapokonhue', dakhuea' e'nopeika'te bo'tihuapokonhue', Diostaj huadak huakika' mo'tihuapokonhue'. Jesucristo onte'ti e'tiakde'te opudada

huadakda kagkike'po kan'nopoike'po
kenpa' on'tiona'pakika'ne.

²⁴Diosa boktie'ea'uayne. Da onahue'
moika'ne. Aya'tada huadak e'kika'
bo'tihuapokika'apone.

**Ta'pota' e'tiona'pak
o'manigdikta'mona'.**

²⁵Oro'takon motiona'pakika' egomey.

²⁶Huama'buytaj keyoda
yan'manigdikta'mona'.

²⁷In beroba' o'nigmadoya'nig aya'
huama'buytaj yan'manati'. Jesús
Huairierea doereada o'nona'ne.

²⁸Jesucristo Huairia di' yamaika'.
Kenpa'ti yamatinepahui'ika',
opudomeytaj ijmatiationapakikay,
ken.